




# KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 2, No. 10

website: [www.geocities.com/navalbec](http://www.geocities.com/navalbec)

Mayo 2006



## Mensaje

FLORES DE MAYO

Ang bulan sa Mayo mao ang usa sa mga bulan (ang usa mao ang bulan sa Oktubre) nga atong gipahinungod kang Maria

Santisima pinaagi sa atong debosyon sa Flores de Mayo. Kini usa ka maayo ug maanindot nga tradisyon nga angay gayud ipadayon dili lamang sa mga kabataan kundili alang usab kanatong mga hamtong na tungod kay ang debosyon sa Mahal nga Birhen Maria alang man sa tanan.

Subay niini, giawhag ko ang mga Gagmay'ng Kasilanganang Simbahan (BECs) sa pagsaulog sa debosyon sa Flores de Mayo diha sa inyong mga kapilya. Ang unod sa maong debosyon mao ang Santos nga Rosaryo, ug dako kaayo nga kalipay sa atong katilingban kun ang tanan makakat-on niining maong debosyon.

Ang Mahal nga Birhen, isip atong Inahan, dili gayud magpabaya sa iyang mga anak nga makanunayon diha kaniya. Kay ang pagduol kaniya mao man usab ang pagduol sa Dios kay iya man kitang pagaagakon ngadto sa iyang anak nga si Hesus. Hinaut pa unta nga ang debosyon sa Flores de Mayo maghiusa kanato ug magdala sa atong katilingban ngadto niini nga mga panuyo.

*"Adlaw adlaw kang Maria,  
ang pagdayeg kantahon ta,  
Uban sa Arkanghel Gabriel,  
Ave maghimaya ka!"*

Bishop FILOMENO G. BACTOL, D.D.  
ug mga Kaparian sa Naval



## PAMALANDONG SA EBANGHELYO

**Mayo 7, 2006:** Ika-4 nga Domingo sa Pasko sa Pagkabanhaw  
Basahon: Buh. 4: 8-12 / 1Jn. 3:1-2 / **Jn. 10:11-18**

### Human sa pagbasa sa Ebanghelyo:

Unsa man nga pulong o mga pulong sa Ebanghelyo ang nakapatandog kanimo? Ngano man?

### Tema: (Basahon human sa mga paambit)

Ang pag-angkon ni Hesus nga siya mao ang matuod nga magbalantay, ang bugtong magbalantay, wala gayoy paglipodlipod. Hinoon kini nagtug-an kon kinsa gayod siya sa iyang pagkamagbalantay. Dili sama sa uban nga wala gayoy pagtagad sa ilang mga karnero. "Ako mismo maoy magbantay sa akong mga karnero ug papahulayon ko sila," nag- ingon ang Ginoong Dios. "Pangitaon ko ang nawala, dad-on ko pagbalik ang nahisalaag, lakilakian ko ang napiang, lig-onon ko ang maluyahon ug bantayan ko ang mga maayog lawas. Pakan-on ko sila sa walay pihigpihig" (Ezeq. 34:15-16). Ingon niini ang pamaagi sa Dios ug ang pamaagi ni Cristo nga mitahan sa iyang kinabuhi alang kanila nga gitugyan kaniya sa Amahan.

Daghan ang wala kasabot niini - ang pakig- ingon sa usa ka panon sa karnero. Bisan pa niana, ang hulagway sa karnero nagsugyot sa tataw kaayo kon unsa kita: mga walay ikalaban atubangan sa mga kumakaon ug mabangis nga mga lobo. Sa tanang mga binuhat ang karnero maoy hayop nga huyang kon maghisgot na og direksyon. Busa hinurot gayod ang ilang pagsalig sa ilang magbalantay aron kapanalipdan ug kagiyahan sila niya.

### Pamalandongi kini:

1. Nasinati ba nimo ang pag-alima sa Dios Kanimo?
2. Isip iyang karnero hinurot ba ang imong pagsalig sa Ginoo aron siya manalipod ug maggiya kanimo?

**Mayo 14, 2006:** Ika-5 nga Domingo sa Pagkabanhaw  
 Basahon : Buh. 9:26-31/ 1Jn. 3:18-24 / **Jn. 15:1-8**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Sa sinugdanan sa ikaduhang wali tapos ang Katapusang Panihapon, si Hesus miingon, “Ako ang matuod nga punoan sa paras!” Sa iyang pagsugilon niini, wala ba kaha siya maghunahuna sa punoan sa paras nga gikulit didto sa tiilan sa templo aron pagsimbolo sa katawhan sa Israel? Ang hulagway mitakdo gayod kaayo sulod sa kinatibuk-ang kahulugan sa Katapusang Panihapon, diin gihatag ni Hesus ngadto sa iyang mga tinun-an ang bino sa bag-ong kasabutan nga gihulagway nang daan didto sa Cana.

Sa bisan unsang paagiha, mopukaw gayod kini diha sa mga kasingkasing sa mga tinun-an sa tibuok kasaysayan sa panaglambigit tali sa Dios ug sa iyang piniling katawhan.

Ilhanan sa panalangin, simbolo sa mabungahong asawa, ang punoan sa paras anaa gayod sa katibuk-an sa kinabuhi niining mga tawhana nga nagdugtong ngadto sa yuta. Ang Dios makapaabot gayod og maayong ubas gikan niining maaayong punoan sa paras nga giluka gikan sa Ehipto ug gitanum sa Canaan. Iya gayod kining giatiman pag-ayo! Apan aslom ra nga ubas ang iyang nadawat niini (Is. 5:1-7). Sa pulong pa sa mga

propeta, ang punoan sa paras nagkahulugan na hinoon sa makasasala ug alaot nga Israel, nga wala magmakanunayon sa kasabutan ug sa ingon pagasilotan tungod sa iyang pagkatig-a. Unya natawo pag-usab ang paglaum alang sa usa ka kahalandong punoan sa paras, usa ka hininloan ug makanunayon nga katawhan ug ang Ginoo maoy ilang tig-atiman adlawg gabii.

“Ako ang matuod nga punoan sa paras, ug ang akong Amahan maoy tig-atiman.” Sa katapusan si Hesus mihingpit sa kalaumang diosnon nga dugay nang napakyas. Sa iyang pagkatawo siya mao ang matuod nga Israel, ug ang iyang dugo mipahimugso sa bag-ong punoan sa paras didto sa Kalbaryo. Busa sukad niadto, walay magmabungahon alang sa Dios gawas kun sila anaa ni Hesus, ug si Hesus anaa kanila, diha sa usa ka pagbinayloay sa gugma nga mao ray bugtong nagmatuod sa kinabuhi sa kamabungahon niini, “Ikaw ania kanako... Ako anaa kanimo.” Mao kini ang gipunayg balikbalik niining maong wali, ang katingalahang saad nga mao ang Eyukaristiya nga gisugdan sa pagtuman.

**Pamalandongi kini:**

1. Sa imong pagkabinunyagan nahasakop ikaw niining dakong punoan sa paras nga mao ang Simbahan. Nagmabungahon ka ba?
2. Nabati mo ba nga ang Ginoo anaa kanimo ug nga ikaw ana-a kaniya?



**KATILINGBAN**  
 Ang akong mga mundo sa Dios: Eucharistia, Communion, EBC, sa parokya sa Wala

**TEAM MINISTRY**

*Team Moderator:* Bishop Filomeno G. Bactol, D.D.

*Team Members:*

- Fr. Marvyn A. Maceda
- Fr. Florencio Gerones
- Fr. Kenneth Hendricks
- Fr. Cornelio AMante, Jr.

*Newsletter Moderator:*

Fr. Marvyn A. Maceda

*Encoder:*

Vinna Sabroso

*Computer Specialist*

Oscar O. Borrinaga

*Business Managers:*

- Rizalito V. Curso
- Conchita Calvez

**PARISH FORMATION TEAM**

- |                  |                    |
|------------------|--------------------|
| Eudoxia Canonoy  | Reymund Icaín      |
| Linda Roldan     | Jonnel Quilaneta   |
| Necitas Casado   | Alfredo Olaer      |
| Catalina Machete | Alfredo Paghubasan |
| Sonia Pitao      | Danny Jayubo       |
| Josephine Romero | Gualberto Tonelete |
|                  | Ramises Bongabong  |
|                  | Jorge Manco        |
|                  | Buddy Castro       |

**Mayo 21, 2006:** Ika-6 nga Domingo sa Pasko sa Pagkabanhaw  
 Basahon: Buh.10:25-48 / Jn. 4:7-10 / **Jn. 15:9-17**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Ang Dios nagtawag kanato ngadto sa usa ka masuknaong pagkinabuhi, galing lang ang mga pamaagi sa Dios sa makadaghan daw managsumpaki sa pamaagi nga atong gituman. Sa pagkatinuod mao kini ang nasinati ni San Pedro. Si San Pedro naghunahuna nga sila lang nga natawo sa Israel ang makaadto kang Cristo, apan pagpadayag sa mga gasa sa Espiritu Santo diha sa kinabuhi sa hentil nga si Cornelius naggun-ob sa tanan niyang mga panghunahuna.

Ang pagkabanhaw ni Cristo nagguba sa tanan tang mga panghunahuna mahitungod sa mga paagi diin ang Dios nagalihok dinhi kanato. Naglumpag kini sa tanang mga babag nga maoy mikuha gikan sa kamatayon sa sulugoon nga nahaadto sa kamatayon tungod sa iyang pagkamasinugtanon sa paghigugma.

Alang sa mga tighimog mga card ang gugma daw sentimental ug malumo. Alang sa mga Kristyanos, ang gugma sama kalig-on ug katinuod sa mga sukna nga gihimo sa mga managhigala nga andam magpakamatay aron ang uban mabuhi. Kana naghatag og mas dakong katarungan sa pag-awit og mga aleluya kay sa maghimog hanap nga mga paghanduraw sa gugma nga mahimong ipatik diha sa card.. Diha sa pagpuyo lamang niining matanga sa gugma diin kita makakat-on nga ang kamatayon ug ang kinabuhi, ang pagkamasinugtanon ug ang kagawasan, ang pagkamabinantayon ug ang katingala, managlahi diay nga mga silaw sa usa ra ka matuod nga Kahayag.

**Pamalandongi kini:**

1. Unsa mang bahina sa imong pagkatawo ang naguba ug nagun-ob sa pagkabanhaw ni Cristo?

**Mayo 28, 2006:** Domingo sa Pagsaka sa Langit sa Ginoo  
 Basahon: Buh. 1:1-11 / Efe. 1:17-23 / **Mk. 16:15-20**

**Human sa pagbasa sa Ebanghelyo:**

Unsa man nga pulong o mga pulong sa Ebanghelyo ang nakapatandog kanimo? Ngano man?

**Tema:** (Basahon human sa mga paambit)

Ang Pagsaka sa Langit sa atong Ginoo maoy usa ka dagway sa naghingapin nga misteryo sa Pagkabanhaw. Ang basahon nga gikutlo gikan sa mga Buhat sa mga Apostoles nagsaysay sa pagbiya ni Hesus sa iyang mga apostoles. Isip natural o labaw sa natural nga panghitabo, makapahingangha gayod kini. Apan ang Bag-ong Testamento wala magbilin kanatog mga detalye. Kita usab makayanghag sa langit ug matingala sa Pagsaka sa atong Ginoo ngadto sa langit, apan kining adlaw dili gayod adlaw sa paghalin.

Adlaw hinoon kini nga nagbutyag sa saad nga si Hesus mobalik. Nagpahinumdom kini kanato nga si Hesus kanunayng nagauban kanato. Tinuod si Cristo mao ang buhing ulo sa Simbahan nga mao ang iyang lawas. Wala nato mamatikdi ang pagbiya. Atong gisaulog ang usa ka presensya.

Busa niining adlaw ang ika-lim-an ka adlaw nga milabay human sa Pagkabanhaw maoy usa ka tukma gayod nga panahon sa pagtagamtam sa atong paglaum ug sa atong kahimtang. Makaplagn nato ang kang Cristong presensya sa matag takna, bagohon nato ang atong huyhoy nga mga espiritu sa mga kahinam sa ginharian. Nanginahanglan lamang kini sa mga mata sa pagtuo, ang kinahiladman natong panglantaw nga makakita sa dakong paglaum, sa mahimayaong kabilin ug walay kinutobang gahom ni Cristo.

Kinahanglang maghugpo kita niining adlaw uban ang bukas nga mga kasingkasing. Wala kita maghugpong diha sa Eyukaristiya aron mapasabot ang Pagsaka sa langit o aron pagsag-ulo sa mga punto alang sa kahubitan niini. Nagtigom kita aron madasig, aron paghalad og pagdayeg ug aron pagsangyaw sa Nabanhawng Ginoo kinsa wala gayod mobiya kanato.

**BEC Reorientation Seminar**

Gipasiugdahan karon sa mga PFT ang paghimo ug BEC re-orientation seminars sa mga katilingban nga nanginahanglan ninii, ilabi kadtong mga katilingban nga naningkamot sa pagpalig-un sa ilang mga selda.

Kining mosunod mao ang mga BECs nga naghimo sa re-orientation: Sabang, Sto. Nino, Hospital Drive, Villa Caneja, Libtong, ug Riverside. Ang uban magahimo sa ilang re-orientation sa umaabot nga mga adlaw.



*Gisaulog sa Diocese sa Naval ang ika 17th nga Anibersaryo niadtong milabay nga Marso 8, 2006 diin pormal usab nga gipasabot ang bag-ong parish assignments sa mga kaparian.*

**Bag-ong Parish assignments**

Gipasiugdahan sa atong Senor Obispo Filomeno G. Bactol, D.D. ang usa ka reshuffling sa mga kaparian sa ilang parish assignments human sa lima ka tuig nga pagpangalagad sa ilang mga parokya. Kini nga taho opisyal nga gipahayag ni Padre Marvyn Maceda, ang Chancellor sa diocese, niadtong Marso 8, 2006 atol sa gihimo nga Chrism Mass ug Pagbag-o sa Panaad sa Pangalagad sa atong mga kaparian diha sa atong Katedral.

Ang kumpleto nga han-ay sa mga bag-ong parish assignments sa atong mga kaparian mao kining mosunod:  
*Almeria:* Fr. Francisco Colasito;  
*Biliran:* Fr. Edelino Suyom;  
*Cabucgayan:* Fr. Jessie Sentina;  
*Caibiran:* Fr. Benjamin Pantas / Fr. Antonio Sevilla (Team Ministry);  
*Calubian:* Fr. Edgar Dolina / Fr. Hipolito Remandaban, III (Team Ministry);  
*Culaba:* Fr. Venancio

Sosing; *Leyte:* Msgr. Silas Florencio, HP / Fr. Edgardo Gumba / Fr. Jesus Ty / Fr. Arnulfo Cordeta (Team Ministry);  
*Lucsoon:* Fr. Edward Veloso;  
*Maripipi:* Fr. Manuel Salarda; *San Isidro:* Fr. Eduardo Abanilla / Fr. Delano Alcon Mocerro (Team Ministry); *Tabango:* Fr. Victorino Japson / Fr. Camilo Maderazo (Team Ministry); *Villalon:* Fr. Ruben Caceres;  
*Naval:* Bishop Filomeno G. Bactol, D.D. / Fr. Marvyn Maceda / Fr. Kenneth Hendricks / Fr. Florencio Gerones / Fr. Cornelio Amante, Jr. (Team Ministry).

Ang iskedyul sa pagpahimutang sa Senor Obispo sa mga pari sa ilang bag-ong mga parokya pagahimuon sugod Marso 27, 2006 hangtud Abril 3, 2006. Atong iampo nga magmabungahon pa gayud ang pagpangalagad sa atong mga kaparian diha niining ilang bag-ong mga parish assignments.

“Kay kon may duha kun tulo nga magkatigom sa akong ngalan, atua ako uban kanila.”

Mateo 18:20



*Gikan sa pahina 3*

**Pamalandongi kini:**

1. Sa imong pagkinabuhi isip Kristohanon, nasinati mo ba nga si Hesus kanunayng nagauban kanimo?

## Joint Parish BEC Fellowship

Gihimo sa parokya sa Naval ang Joint Parish BEC Fellowship niadtong Abril 23, Domingo, sa Katedral. Mahinuduman nga ang tibuok parokya sa Naval gibahin ug kaduha tungod sa



kadaghan sa mga BEC lidere nga motambong sa maong panagtigum. Ang Area One nga naglangkob sa mga barangay gikan sa Hagikhican padulong Caraycaray nagahimo sa Parish Fellowship kada ikatulong Sabado sa bulan, samtang ang Area Two nga naglangkob sa Poblacion padulong Calumpang ug Sabang nagahimo sa fellowship kada ikatulo nga Domingo sa bulan. Apan gisabutan usab nga pagahimuon ang hiniusa nga fellowship matag bulan sa Abril, Agosto, ug Disyembre.

Sa atong mga BEC lidere, daghang salamat sa inyong kanunay nga pagtambong sa atong mga fellowship!

**"Ayaw kamo kabalaka sa bisan unsa kondili pangayoa sa Dios ang inyong gikinahanglan uban ang pagpasalamat sa tanan ninyong pag-ampo."**

*-Filipos 4:6*

## Despedida

Gihimo niadtong Marso 26, 2006, Domingo, ang usa ka despedida party alang kang Fr. Benjie Pantas, Fr. Bing Colasito, ug Fr. Jess Ty. Gisugdan ang maong kalihukan pinaagi sa usa ka concelebrated mass sa alas 5:00 sa hapon sa Katedral nga giubanan ni Fr. Marvyn Maceda. Human niini, nagtigum ang mga BECs sa lungsod ug sa mga barrios didto sa Naval gymnasium diin gipasiugdahan ang panagtigum.

Sa gihimo nga programa, nagpasalamat ang tulo ka pari sa katawhan ug naghangyo nga padayon sila nga iampo sa ilang bag-ong mga katungdanan. Ang mga BECs sa ilang kabahin, nagpakita sa ilang pagsuporta ug paghigugma pinaagi sa usa-usa nga pagduol sa tulo ka pari ug pagpadayag usab sa ilang suporta ug pasalamat.

Si Fr. Bing Colasito gipahimutang nga bag-ong kura sa Almeria niadtong Marso 27; si Fr. Benjie Pantas sa Caibiran niadtong buntag sa Marso 30; ug si Fr. Jess Ty sa mao gihapong adlaw (Marso 30) sa hapon sa Leyte.

**Parish Formation Team**  
Basic Ecclesial Communities  
Holy Rosary Parish, Diocese of Naval, PHILIPPINES

**Bendita sa Lukay** (April 9, 2005 at Bus Terminal)

**Digital Photo Gallery**


- Holy Week 2005
- Ang mga Apostoles
- Parish & BEC Christmas Party '05
- CSN's 10th Founding Anniversary Parade & SilveWoon

PFT's website: <http://www.geocities.com/navaldiocese/>

*BEC Balita...*

## W e l c o m e

Malipayon nga gidawat sa kristohanong katilingban sa Naval kaniadtong Abril 3, 2006, Lunes, ang duha ka mga pari nga bag-ong



mangatungdanan sa parokya sa Naval. Kini mao sila si Fr. Florencio Gerones nga gikan sa Culaba, ug Fr. Cornelio Amante, Jr. nga gikan sa Leyte.

Gisugdan ang kasaulugan pinaagi sa usa ka Santos nga Eukaristiya nga gipanguluhan sa atong Senor Obispo Filomeno Bactol, D.D. kauban sa mga kaparian sa Naval sa alas 5:15 sa hapon. Human sa misa, gisunod dayon ang usa ka mubo apan mainiton nga programa sulod sa Katedral isip pagdawat kang Fr. Bebot Gerones ug Fr. Dyon Amante. Human niini mao ang usa ka salu-salo didto sa kumbento nga gipaluyuhan sa mga BECs sa poblacion.

Welcome Fr. Bebot ug Fr. Dyon!

## **LJC** *Rice Mill* & *Groceries*

Owned & Managed by:

**RAMISES "Bong" BONGABONG**

## **BEC ACTIVITIES**

May 2006

May 6, 2006

### **CLUSTER FELLOWSHIP**

BEC Ilaya & Smo. Rosario

Venue: Cathedral Church

May 20, 2006

### **PAROCHIAL FELLOWSHIP**

Venue: Sitio Mocalbocal Chapel

8:30 am- 3:30 pm

May 21, 2006

### **PAROCHIAL FELLOWSHIP**

Venue: Sitio Puro Bliss Chapel

8:30 am - 3:30 pm

## **BEC ANNIVERSARY**

May 4, 2006

### **BEC Brgy. Talustusan**

May 11, 2006

### **BEC Sitio Kawayanan**

May 13, 2006

### **BEC Sitio Bagaycay**

May 24, 2003

### **BEC Upper Anas**

May 30, 2006

### **BEC Sitio Magtaran-an**

**NAVAL COUNTRY INN**

*"Your home away from home"*

&

**NAVAL TOWN CENTER**